



Als Bolizyscht hesch's nit aifach, kasch uns nit verzelle
Will die müen jetzt uff dr Strooss ihri Köpf abstelle
Denn damit meh überhaupt no derf e Schugger bliebe
Muess jede Bolizyscht ganz aifach nur sächs Buesse schriebe.

Ihr bleede Schwyzer rutsched mir doch aifach ab em Buggel
Meint e Diirgg im Stadion zu unserem Beení Huggel
Dr Beení sait was isch denn i däm Joor no viel schöner
Als d'Fuessball-WM gseh in Istanbul mit eme Döner

E Flasche fliegt mir an d'Bire und e Fuscht in Ranze
E Kopfstoss a mis Nasebaí, das bikunsch bim danze
E Mässer steggt im Rugg heí mir wird jetzt langsam sturm
Das isch dr usgang gsi in dr Bar Rouge im Mässeturm

Im Nooverkehr mit Saver Sex do froogt sich mänge Maa
Ob är däm BVB-Kondom au wirgglig traue cha
Nach em letschte Briefigsbricht, isch es gar e Bschiss
Denn sí hán wie d'Combinos - do und dort e Riss

Dr Blocher hett im Färnseh vo de US-Gfängnis gseh
Do chunnt ihm denn sofort spontan - folgendí Idee
Dr Christoph nimmt grad Kontakt uff und froogt denn s'CIA
Isch ächt no e Blätzli für dr Leuebärger frei

Ziri brucht e neue Name und zwar ein mit Rasse
Sommerau - hán mir uns dänggt würd prima zur Stadt basse
E Namenswäggsel isch ächt böimig und no richtig schlau
Denn Ziri isch im Winter scheisse - und im Sommer au

Was do so vo Oscht nach Weschte fliegt, es isch ächt fatal
Mir sín grad e chli zämme zuggt, das isch doch nid normal
Es soll Euch nid beunruhige, es isch nur e Information
Dä Helge zaigt die neu - Zugvogel Foormation

Als Basler Fan do könne mir dr Latour gar nid Loohe
Zeerschafft är bi Ziri und jetzt no bi de Schwoobe
Doch z'Köln hett är e schwärs Problem und schrieht sim Fründ em Sämi
Sag Du mir doch bitte schön wie säisch uff Hochdytsch - „Gränni“

D'Basler hän Nobälbryysdräger, Genf d'Reformatore
D'Innerschwyz hett siner Zyt jo unsere Bund beschwore
Doch was Zircher gläuschtet hän, das weiss me leider nimmme
Drum hett me si jetzt wenigstens - das Pisaspiel lo gwinne

Fasnacht 2006